

Linguissimo senza Rumantschs?

Runda finala da la concorrenza da quest onn a Cuira

■ **(anr/fa) Per promover la chapientscha vicendaivla tranter las cuminanzas linguisticas ha lantschà il FH la concorrenza Linguissimo. Per quella da quest onn na s'han fin uss annunziads nagins giuvenils rumantschs.** «Punts sur le Röstigraben svizzero»: La finamira dal project Linguissimo ch'il Forum Helveticum (FH) realisescha quest onn per la quarta giada ha la finamira da promover la chapientscha vicendaivla da giuvenils da 16 fin 20 onns da tut las quatter cuminanzas linguisticas. Il tema da quest onn è «Mia relaziun cun ils meds da communicaziun electronics». «Malgrà che la runda finala ha lieu quest onn al cumenzament da matg a Cuira s'han enfin uss annunziads mo trais giuvenils grischuns, tuts da lingua taliana», di *Paolo Barblan*, il manader da gestiun dal FH e dal project Linguissimo. El preschenta questa concorrenza da scriver nazionala.

Dus texts en duas linguas

En l'emprima runda vegn organisada ina concorrenza da scriver. Giuvenils da tut las regiuns linguisticas inoltreschan dus texts curts: L'in en lur lingua materna davart il tema da la concorrenza e l'auter cun in autportret en in'otra lingua nazionala. En la segunda runda s'inscuntran las auturas ed ils auturs da las 30 meglras lavurs ina fin d'emna a chaschun d'in «inscunter da las linguas». Là han els l'ocasiun da discurren cun experts dal tema da la concorrenza e da scriver ensemen cun in partenari d'ina outra regiun linguistica in text comunabel. Ils megliers trais «tandems» survegnan in pre-

mi: «Quai è in viadi en ina citad da l'Europa, l'onn passà en els stads a Berlin, avant dus onns a Paris», di *Paolo Barblan*, «l'unica cundiziun è ch'els fetschian il viadi tuts ses giuvenils ensemen. La decisiun nua ch'els vulan ir ston els trair gist suenter la premiaziun.» Questa runda finala cun premiaziun è mintg'onn en in auter lieu, suenter Lenzburg (AG), Bevaix (NE) e Locarno (TI) vegn realisà il quart inscunter da las linguas quest onn ils 5 e 6 da matg a Cuira.

Chantuns plurilinges ils pli difficils

Sco *Paolo Barblan* menziuna han mussà las experientschas dals emprims trais onns che inscunters curts, però emozionalmain intensivs hajan in effect duraivel tar ils giuvenils: «Tut las persunas participadas, tant ils giuvenils sco er ils creschids, han reagì cun grond entusiassem, els han surtut apprezzà ch'igl è stà uschè facil da communitar e lavurar cun persunas da las outras linguas e culturas.» Perquai è el surstà ch'ins ha survegnì quest onn be paucas annunziads per il quart Linguissimo. A la concorrenza da l'onn passà avevan tenor el prendì part 40 giuvenils grischuns, in quart da quels rumantschs e mintgamai 15 da lingua tudestga e taliana. «Quest onn dentant avain nus las pli paucas annunziads gist en ils chantuns plurilinges Grischun e Vallais sco er en il chantun Neuchâtel. Il motiv nun ans è enconuscent.»

«I nun è anc memia tard per s'annunziar»

Il termin per s'annunziar è ils 10 da favrer, quel per inoltrar ils

texts la fin favrer. *Paolo Barblan* spera ch'i decidian anc divers giuvenils grischuns, «e tranter quels era giuvenils da lingua rumantscha», da's participar al quart Linguissimo. In grond agid da cuntanscher questa finamira è sco ch'el di era quest onn puspè la buna collavuraziun cun la magistraglia: «Ils ultims onns ha ella adina fatg reclama per nossa concorrenza e sustegnì lur scolaras e scolaras che avevan decis da sa participar.» Ils flyers, ils taluns d'annunzia ed ulteriuras infurmaziuns chattan ils interessads sin la pagina d'internet da la concorrenza svizra da las linguas www.linguissimo.ch.

Rumantsch bain represchentà en la giuria

Il Forum Helveticum è vegnì fundà dal 1968 sco associaziun independenta, confessionalmain e politicamain neutrala. El è naschì dals sforzs per institucionalisar ina «conferenza nazionala per reponderar la situaziun actuala da la Svizra». Ina finamira essenziala dal FH è la chapientscha vicendaivla tranter las quatter cuminanzas linguisticas en Svizra. La giuria da la concorrenza Linguissimo vegn presidiada da *Paolo Barblan*, oriund da Vnà. Ils ulteriurs commembers èn il scolast da talian *Marco Badan* en il Tessin, l'assistenta al seminari rumantsch da l'Universitad da Turitg *Valeria Badilatti*, *Karin Buechli* dal partenari Netzwerk Müllerhaus, la romanista *Renata Coray*, la manadra da «ch Barat da giuvenils» *Silvia Mitteregger* ed il romanist e mediatour cultural *Chasper Pult*.



Sandro Buchli da Laax e Valérie Christe (VD), il «tandem» ch'è vegnì l'onn passà segund.

FOTO FORUM HELVETICUM